

Na osnovu člana 12. tačke 3., člana 13. tačke 4. i člana 14. tačke 4. Zakona o veterinarstvu u Bosni i Hercegovini ("Službeni glasnik BiH", broj 34/02) i člana 17. Zakona o Vijeću ministara Bosne i Hercegovine ("Službeni glasnik BiH", broj 38/02), Vijeće ministara Bosne i Hercegovine na prijedlog Ureda za veterinarstvo Bosne i Hercegovine, na 26 sjednici održanoj 30. septembra 2003.godine, donijelo je

## **ODLUKU O ZARAZNIM BOLESTIMA ŽIVOTINJA**

### **OPĆE ODREDBE**

#### **Član 1.**

##### **Predmet odluke**

Ovom odlukom određuje se razvrstavanje zaraznih bolesti životinja radi načina obavještanja, izvještavanja i prijavljivanja njihove pojave, laboratorijske testove za njihovo utvrđivanje, metode uzimanja uzoraka i uvjete slanja materijala na dijagnostičke pretrage.

#### **Član 2.**

##### **Značenje termina**

Termini upotrijebljeni u ovoj odluci imaju slijedeća značenja:

**imanje** je svaki objekat, u kojem se uzgajaju životinje;

**dio države** označava područje djelovanja najmanje jedne veterinarske organizacije odgovorne za provođenje mjera propisanih na osnovu člana 10. tačke 7. Zakona o veterinarstvu u Bosni i Hercegovini;

**slučaj bolesti** je svaka službena potvrda bilo koje bolesti, navedene u aneksu 1 ove odluke, na živoj ili mrtvoj životinji ili njenom dijelu;

**izbijanje (žarište) bolesti** je pojava jednog ili više službeno potvrđenih slučajeva bolesti na imanju ili području, koje se nalazi na teritoriji Bosne i Hercegovine;

**primarno žarište bolesti** je prvo izbijanje bolesti na nekom području, ili izbijanje bolesti koje nije epizootiološko vezano na prethodne pojave bolesti na istom području;

**plan hitnih mjera** je Plan koji sadrži postupke i procedure koje se preduzimaju prilikom pojave žarišta bolesti s ciljem njenog suzbijanja, kontrole i iskorjenjivanja;

**odgovorno veterinarsko tijelo** (u daljem tekstu: OVT) - Ministarstvo poljoprivrede, vodoprivrede i šumarstva Federacije BiH, Ministarstvo poljoprivrede, šumarstva i vodoprivrede Republike Srpske i Odjeljenje za poljoprivredu, šumarstvo i vodoprivredu Brčko Distrikta Bosne i Hercegovine, sa svojim organima nadležnim za provođenje propisa iz područja veterinarstva;

**službeni veterinar** je veterinarski inspektor, djelatnik OVT;

**krizni štab** je Državno središte za nadzor bolesti, tim stručnih osoba, kojeg čine predstavnici Ureda za veterinarstvo Bosne i Hercegovine, OVT, vojske, policije, civilne zaštite i drugih službi, koji rukovodi svim aktivnostima vezanim za pripremu i provođenje mjera u slučaju pojave bolesti s liste A aneksa 1 ove odluke.

### **I - RAZVRSTAVANJE ZARAZNIH BOLESTI ŽIVOTINJA**

#### **Član 3.**

##### **Liste bolesti**

Zarazne bolesti životinja, radi kojih se izvode opće i posebne preventivne te druge propisane mjere, se obzirom na vrstu infekcije, mjera za njihovo suzbijanje i iskorjenjivanje te dinamiku i način izvještavanja o pojavi razvrstavaju u liste A, B, C i zoonoze, kako je određeno u aneksu 1, koji je sastavni dio ove odluke.

#### **Član 4.**

##### **Obavezno prijavljive zarazne bolesti**

Obavezno prijavljive zarazne bolesti životinja su bolesti, navedene u listi A aneksa 1, i bolesti iz tač. 1., 2., 5., 6., 7., 8., 11., 14., 16., 19., 20., 21., 25., 26., 27., 28., 36., 39., 41., 42., 46., 49., 52., 55., 56., 57., 58., 66., 71., 72., 73., 74., 76., 77., 78., 79., 80., 81. i 82. liste B aneksa 1 ove odluke.

Pri sumnji na bilo koju bolest iz prethodnog stava potrebno je postupiti tako, da se zarazna bolest iskorijeni odnosno da se sumnja na zaraznu bolest isključi.

#### Član 5.

##### **Plan hitnih mjera**

Zarazne bolesti životinja, za koje je potrebno propisati plan hitnih mjera po kojem se postupa u slučaju njihove pojave, su bolesti iz tač. 1. do 14. liste A aneksa 1 i bolest iz tačke 26. liste B aneksa 1 ove odluke.

Za ostale bolesti plan hitnih mjera iz prethodnog stava se propisuje zavisno o epizootiološkoj situaciji.

Plan hitnih mjera treba sadržavati najmanje informacije, navedene u aneksu 2, koji je sastavni dio ove odluke.

## II - OBAVJEŠTAVANJE, IZVJEŠTAVANJE I PRIJAVLJIVANJE ZARAZNIH BOLESTI ŽIVOTINJA

#### Član 6.

##### **Obavještanje i izvještanje o zaraznim bolestima životinja u državi**

Ako se pojavi zarazna bolest ili se pojave znaci, na osnovu kojih se sumnja, da je životinja bolesna ili je uginula od zarazne bolesti, vlasnik ili držalac životinje je obavezan o tome obavijestiti najbližu veterinarsku organizaciju.

#### Član 7.

##### **Postupak u slučaju sumnje na bolest s Liste A**

Ako se pojavi sumnja na bolest s liste A aneksa 1 ove odluke, veterinarska organizacija koja je postavila sumnju je obavezna, o tome telefonom i faksom ili elektronskom poštom na obrascu, koji sadrži propisane podatke, a najkasnije u roku 24 sata, obavijestiti nadležnog službenog veterinaru, te do njegovog dolaska provoditi sve mjere za sprečavanje širenja zaraznih bolesti propisane Zakonom o veterinarstvu u Bosni i Hercegovini.

OVT je obavezan hitno, najkasnije 24 sata od postavljanja sumnje, prijaviti svako postojanje sumnje o pojavi bolesti s liste A aneksa 1 ove odluke Uredu za veterinarstvo Bosne i Hercegovine, (u daljem tekstu: Ured), koji će u najkraćem roku sazvati članove kriznog štaba.

U svrhu dojave informacija o sumnji ili pojavi zaraznih bolesti s liste A aneksa 1 ove odluke Ured i OVT dužni su uspostaviti dežurni telefonski broj.

O rezultatima obavljene dijagnostičke pretrage ovlaštena laboratorija obavještava Ured i OVT, putem telefona (na broj dežurnog telefona) i telefaksa ili elektronskom poštom.

Podaci, koje mora sadržavati obrazac iz prvog stava ovog člana, su određeni u aneksu 5, koji je sastavni dio ove odluke.

Prijavu sumnje odnosno potvrde bolesti s liste A aneksa 1 ove odluke i redovne sedmične izvještaje do prestanka primjene mjera u području pojave žarišta bolesti, OVT dostavlja Uredu na obrascu iz Aneksa 6 koji je sastavni dio ove odluke.

#### Član 8.

##### **Postupak u slučaju sumnje na određene bolesti s Liste B**

Ako se pojavi sumnja na bolesti iz tač. 1., 2., 5., 6., 7., 8., 11., 14., 16., 19., 20., 21., 25., 26., 27., 28., 36., 39., 41., 42., 46., 49., 52., 55., 56., 57., 58., 66., 71., 72., 73., 74., 76., 77., 78., 79., 80., 81. i 82. liste B aneksa 1 ove odluke, veterinarska organizacija je dužna o sumnji na bolest obavijestiti nadležnog službenog veterinaru.

O rezultatu dijagnostičke pretrage ovlaštena laboratorija je dužna putem telefona i telefaksa ili elektronske pošte na propisanom obrascu odnosno putem kompjutera upotrebom kompjuterskog programa za zarazne bolesti (u daljem tekstu: putem kompjutera) obavijestiti nadležnog službenog veterinaru koji o tome izvještava OVT.

U slučaju pojave primarnog žarišta jedne od zaraznih bolesti iz prvog stava ovog člana, ovlaštena laboratorija o rezultatima dijagnostičke pretrage također obavještava i Ured i OVT, putem telefona (na broj dežurnog telefona) i telefaksa ili elektronskom poštom.

#### Član 9.

##### **Postupak u slučaju pojave svih ostalih bolesti**

U slučaju pojave bolesti sa liste B aneksa 1 ove odluke, koja nije navedena u prethodnom članu, ili za bolesti sa liste C aneksa 1 ove odluke, veterinarska organizacija je dužna obavijestiti nadležnog službenog veterinara, kad se bolest potvrdi propisanom dijagnostičkom pretragom. Veterinarska organizacija jednom mjesečno do 5. u mjesecu za protekli mjesec, izvještava nadležnog službenog veterinara o pojavi tih bolesti na propisanom obrascu ili putem kompjutera.

Redovne mjesečne izvještaje o pojavi bolesti s liste A, B i C aneksa 1 ove odluke OVT dostavlja Uredu najkasnije do 10. u mjesecu za prethodni mjesec na obrascu iz Aneksa 7 koji je sastavni dio ove odluke.

#### Član 10.

##### **Postupak u slučaju zoonoza**

Ako se pojavi sumnja na bolesti sa liste zoonoza aneksa 1 ove odluke, provodi se obavještavanje u skladu sa čl. 7., 8., ili 9. ove odluke, zavisno od toga, na kojoj listi (A, B ili C) se bolest nalazi.

O sumnji ili potvrdi zoonoze službeni veterinar je dužan obavijestiti nadležnu zdravstvenu službu.

#### Član 11.

##### **Rezultati dijagnostičkih pretraga**

Rezultate dijagnostičkih pretraga ovlaštena laboratorija je dužna poslati nadležnom službenom veterinaru i pošiljaocu na propisanom obrascu ili putem kompjutera.

Jednom mjesečno, najkasnije do 15. u mjesecu, ovlaštena laboratorija je dužna poslati potpuni izvještaj o rezultatima svih provedenih dijagnostičkih pretraga u prethodnom mjesecu Uredu i OVT-u, na propisanom obrascu ili putem kompjutera.

#### Član 12.

##### **Obavezno međunarodno prijavljive bolesti**

Obavezno međunarodno prijavljive bolesti su sve bolesti s liste A aneksa 1 ove odluke i bolesti iz tač. 26., 57. i 82. liste B aneksa 1 ove odluke.

Obavezno je prijavljivanje:

- primarnog žarišta neke bolesti, navedene u prethodnom stavu;
- prestanka primjene mjera, koje su bile uvedene u vezi pojave žarišta bolesti, navedene u prethodnom stavu.

Ured je dužan bolest prijaviti odmah, a najkasnije u roku 24 sata Međunarodnom uredu za zarazne bolesti u Parizu (OIE), Evropskoj komisiji i nadležnim veterinarskim organima svih susjednih država.

Prijava treba sadržavati informacije, nabrojane u aneksu 3, koji je sastavni dio ove odluke, i obavezno se šalje putem telefaksa ili elektronske pošte.

Bez obzira na drugi stav ovog člana, Ured je dužan svaki prvi radni dan u sedmici prijavljivati OIE-u, Evropskoj komisiji i nadležnim veterinarskim organima svih susjednih država pojave sekundarnih žarišta bolesti iz prvog stava ovog člana, koja su se pojavila u državi.

Prijava bolesti iz prethodnog stava treba sadržavati sve informacije iz aneksa 3 ove odluke.

### III - ODREĐIVANJE LABORATORIJSKIH TESTOVA I METODA, UZIMANJE UZORAKA I SLANJE MATERIJALA NA DIJAGNOSTIČKE PRETRAGE

Član 13.

#### **Testovi, uzorci i način slanja uzoraka**

Laboratorijski testovi i metode za pretragu i utvrđivanje pojedinih zaraznih bolesti iz ove odluke, način uzimanja uzoraka i slanja materijala na dijagnostičku pretragu, su određeni u tabeli aneksa 4, koji je sastavni dio ove odluke.

Pretrage na zarazne bolesti životinja, za koje u državi nema na raspolaganju odgovarajućih prostora, ili metoda i opreme, obavljaju se u referentnim laboratorijama OIE-a ili drugim referentnim laboratorijama, s kojima Ured ima sklopljen ugovor o saradnji.

Koordiniranje uzimanja uzoraka spomenutih u prethodnom stavu i njihovog slanja u referentne laboratorije provodi Ured.

### IV - PRIJELAZNE I ZAVRŠNE ODREDBE

Član 14.

#### **Obrasci za prijavu bolesti**

Do izrade kompjuterskog programa koji će se koristiti u svrhu izvještavanja o pojavi zaraznih bolesti u cijeloj državi, a koje se spominju u čl. 8., 9., 10. i 11. ove odluke, u slučaju da nisu propisani ovom odlukom, upotrebljavat će se obrasci, koji su se upotrebljavali za tu namjenu do stupanja na snagu ove odluke.

Član 15.

#### **Stupanje na snagu**

Ova odluka stupa na snagu osmog dana od dana objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

---

VM broj 244/03  
30. septembra 2003. godine  
Sarajevo